



mie dr. Ā. Butuls ypizjielami. Se vana ja sūr līvōd sōbra perizis ājgastis jienō vōiksliz lālemōd rujadōks. 1938. ā. talzipyvad kū 14. pāvan, ūopdzōl varrō loptiz tām līvōdōn sōbrali sydam pūksō. Dr. Ādams Butuls, syndōn 1860. ā. mērt kū 14. pāvan, voļ Letmā līlīzskūol pūojtiji ja Letlist opatōks seļts rōkmiez. Ta voļ suggōn Idus kīlgōndōst Vidumal ja tām tyō Letmā rouvō tyōnurms um vond sūr. Volg tām novvimi izamā jōvgōs kebam!

1939. udājgast kū 17. pāvan tāvgōd palabtōb līvōd sōbradōn ryōviz jōva tyōtējiz, kōpmietieud kandidat Vladimirs Upešleja. Ta voļ Līvōd sōbrad seļts Letmāl pūojtiji ja obimist kasier, suggōn Vidumald, Krauklīz kīlgōndōst, kus tām aim āll voļ Buokiz kārand, V. Upešleja lagiz epts ja seļts tyōst jiera paramis joud aigastis volds. Līvōd sōbrad Letmāl tānda mād-lōtōbōd kōgip.

Tāmnaigast ūdaigast kū 15. pāven sugiz sōbrad seļts tāuzkub, missōs sai sizzōl nustōt ūz jūd. Seļts eđdizmiekōks tuļ folklorist ja tēdtōks kaipiji Roberts Klaustips, tām ablistōks pāp Kārlis Lazdiņs ja dirigent Hermanis Prūsis, siktārōks kiel-tieud student Laimons Rudzītis, kasierōks ekonomijtieud kandidat Marija Sāns, suoratōd tēdijizōks opatiji Jānis Tambergs ja vīla tēdajizōks bājk kaptein Mērt Lepste. Revizij komisijō seitō sizzōl nustōt: ōigiztieud kandidat Mārtiņs Sams, advokat Gustavs Kempels ja amatmiez Krisjānis Zellis. Seļts adres paldip um: Rīgā, Visbijas prosp. 20 - 1.

Um lūotimist, ku tāmsygzō seļts tāiz yrgub jiembit jellō, sīest tyōdō tāmmōn volks kyl jennō.

Y.

### Izamān, syndimān, rouvōn!

Tōurōz izamā mād, Letmā, kōrkōks Sīnda, jiega pāva jiellos, tiem. Grumanikist sīnda kaitsōs, nōrkōks Mittō kunagid mēg kyl āb iem, Usklist jōba sinnōn kōgip vonnōd, Usklist mēg ka sin jedst kūlōs līm!

Piški syndimā mād, rāndanajgas, Armaz ūod sa mādōn vond ja līd. Kupts set mierrōl, nurmsi, ilmas lajgas Rāndakēļ vel knašsō kilub sīd, Usklist jōba sinnōn amust vonnōd, Usklist mēg ka tulbōs sinnōn līm!

Muinist rāndarouž mād, izaizad Vanad pierandōks, mīs mādōn ūod. Tēdi ouvō nustōs āmsi vizad Pīlōm, volg se vōrōmā, kas kuod, Usklist jōba tāddōn lapsōld vonnōd, Usklist igabiz mēg tāddōn līm! Lembe Rāndali.

### Rovkuoda.

Yļ līvlist rovkuoda pyvastimiz pyvad 6. august kū pāvan um kēratōt nej Latvija, kuj ka mād sugrovd, sūomlist, ēstlist ja ungarđ aigakēris. Sūomōmā ja Ēsti radiofonis um ta ka kultōb vond. Sīepierast ma āb tā "Līvlizōs" sīeda ēntsa emip ūd pāl nīzō. Pyvad at vonnōd ja pāgip tienandōkst nāntōn amadōn, kis nēdi at ouvōstōnd ents jūsvolmizōks, tienandōks amad organizātsijidōn, kis voļt kaimōnd vertlīzi andidi, tienandōks nāntōn kis voļt murtōnd yļ pyvad kōrdōlpanmiz ja tienandōks nāntōn amadōn, kis pyvad puskantist lōlōdōks, nāgtimistōks ja jeddōkādamistōks.

Pyvad nāgtist pāgip tādōlpandōbtō, mū vail ka sīeda ku līvlist mittōsuggō āb ūot nej periz pāl kaddōnd ja ku ne vōibōd, ja sōitabōd, āz set tēbōd ka kultur tyōdō tēdō. Kūođin mād nūorim kazam nāgtiz sīeda, ku nānb vail um seļlīzi, kis sīeda sōitabōd. Tāsa nī volks "Līvlist Yt" jūd āza se, murtō yļ sīe, amđi kulturtyōtējidi kubsō pidō, nāntkōks kontaktōs vōlda ja ūoļtō yļ sīe ku rovkuoda tāutōb tām pāl pandōtō lūotōkstō ja sāb ka līvlist kulturelliz sydamōks (tsentrōks).

Yļ rovkuoda, se um yļ tām mūrōd, ukst ja lābud, yļ kuoda ymmarkouļ, tām ylzō pidamiz j.n.k. murtōb rovkuoda fōnd, ja yt jūd ylzandōks, āz ta tēb vōlda se, missōn tāmmōn um volmōst, um ni se, murtō tegiz yļ sīe laz kuod-

dō suggōg ka kulturelli vaim  
ja laz kuoda ytōg ja pidag  
yllō līvlist, līvlist kiel ja  
kultur.

Irainika.

Vaimli loulrāntōz.

Rovkuoda pyvastimiz py-  
vadōks voļ pāp H.K.Ervio Sūo-  
mōmāld yni tuond vaimliz loul-  
rāntō randakiels, lūotōksōs, ku  
līvlist tānda ka kōlbatōbōd.

Rāntōz maksab līvlistōn  
20 sant. kabalōs ja et paldip  
sādōbōd "Līvlist yt" biblioteks.

Rovkuoda pyvastimiz pāvaks.

Um ykškōrd jellōn sūr ja veggi rov,  
kis ēntsta voidōs pāgip vajjō neiz.-  
Siz undōt tāma sai ja kitistō,  
ku līvlist kaddōnd at māilmastō.  
Set sātōks siedo muitiz pandum,nej,  
Ku suggōmōst voļ vaban Latvijan,  
yl mis ka līvlist pūogad vōikslistō,  
kujjennō nēdi pālō vel voļ iend;  
ja lubbō sai ni jōvgō rāndasō  
se pāliend piški pyvtāuz līvliži,  
kuj līvli jellō,-kuolō līvli volds,-  
Ja sugrovd, suomlist, ēstlist ungarōd,  
tuļt jōva mielkōks abbōl kulturtyōs:  
Vōiž suggō līvlist kulturelli yt,  
vōist sādōt lōlōd louldōt jemakiels  
ja jemakēļ sai skuolis opatōt.  
Nūord līvlist daitō vōttōt Suomōmāl  
ja Ēstizō, laz emip oppōgōd,  
sai mekstōt mūndan skuolrā Latvijas.  
Sait ulzō andtōt rāntōd randakiels,  
Ūz testament um yļļōnustōt sānd  
ja suomlist abkōks ulzōtund um ka  
mād piški aigakēra "Līvli" nims.  
Tuļt jega aigast andōd nant pierast,  
kis skuolis rāndakielōd opistō.-  
Voļ virgtōt kulturtyō ni līvlist vail!  
Yks pūtōks pikstiz līvliži seb vel,  
ka lāndali ja idali rov  
voļ jagdōt kādō jaggō- pagastō,  
kiend vailō liēdamōsb voļ siēimtō.  
Ku sellizōks vōiks vōlda rovkuoda,  
se mōtkōz emip līvližist iz lag;  
ja sugrovd kulturellist kūozistō  
ne tygtōt kie pāl ēntsta ajistō  
Jaz kujgid sāgōd iz ēnts kuoda jūb.  
Iis tiedab, kas jel kunagid volks sānd  
se piški līvlist rov ēnts kuoda jūr?!-  
Tuļ maj kū pāva se vīztuoistōnōz,  
nis vonnō tuond um aman Latvijan;  
ūz pāvalikā paistiz aman mān,  
ta paistiz amzi, līvlist randō ka,-  
voļ aiga tund ni nustō rovkuoddō!  
Iz vibtōt līvlist sie jūr akkō ni,

tuļt abbōl Latvija ja sugrovd sūrd,  
ja ukaz, valmōz pilōb rovkuoda.-  
Siz vōtagid ni vastō tienandōks,  
mis līvlist tāmpō amast sydamōst,  
leb min at pannōd Tāddōn kitōmō.  
K.Stalte.

Um murtōmōst yl līvlist  
nūor kazam.

Jegaykš kulturelli tyō vōib  
jeddōpēdin lādō set siz ku rov  
vail um sellizi, kis sōitabōd  
andō vaimliz jelamizōn viljō,  
missō kōlbatōs vaimli jelami  
progressōb. Um siēldi, ku āb  
kalamiez, āb mā kŷndaji, kuj  
vertli nant tyō kyl muitiz um,  
ēnts tyōkōks vaimlist jelamist  
yllōpiddō āb sōitat. Siēpierast  
volks ytōluggō murtōmōst yl sie,  
algō līvlist vail pūtōg ka opa-  
tōt rouvsti. Volks liēdamōst  
riek, kuj vōiks tygtō nūori līv-  
liži, laz ne sāgōd sūrim opatōks  
jūr. Tygtimi um vajag siēpierast  
ku ne, kis ēntsta pidabōd līv-  
listōks ja vel līvlist kiēldō  
mūostabōd ja rōkandōbōd, at sū-  
rimiz jagukā kūoḡin ne joutōmōd  
nūord līvlist, kiēnd vanbist āb  
sōitat nēdi kougimōl skuoliz  
kaimō. Kyl ka jedmōl at nūord  
līvlist tygtōt - aga mis vōib  
tiedō ku sātōks um vond selli,  
ku nōsti sū rim jag līvlist  
vaimliz jelamizōn mittō mingist  
abbō āb ūo tuond, pāgip nēsti  
at ēnts rov pierast kas veitō,  
kas mittō midagid tiēnd. Miks  
ta nej um, um lālam kitō, vōib  
vōlda ku ne ist ūot ne ōigist  
kis saitō "kutstōt" ēnts rov  
pierast tyōdō tiem.

Aga laz volgō kuj volds,  
se set vōib midagis andō kiēn  
ēntsōn um, kis emip mūostab,  
ja siēpierast volks ytōluggō  
tygtōmōst nūori līvliži, laz ne  
sāgōd emip skuolis kādō. Amad  
kaddōm āb lāt, nant vail sug-  
gōks ka sellizi, kis pidakst  
siedo mielsō, ku set siēpierast,  
ku ne at līvlist, nantōn um  
ābtōt sūrimiz skuol jūr sādō, ja  
sellist kōlbatōkst ēnts tie-  
damiz rov kulturellizōs tyōs.

M.

Līvlist ūt statutōd.

(3. jatk.).

B. Jūd.

§ 34.

Ūt tāutiji organ um tām tāudkubsō kattōt yōltōs 1 aigast pāl vēldōt jūd, kus at ilm ūt jūdijist jūd eđizmīe, 4 nipstō ja kaks kandidatō jūokšijiz aigast pierast.

§ 35.

Pierrō tāudkubs suggōn vēlimiz jūd nipstad entš ezmizōs istamizōs vēlōbōd entš vaid ūt jūdijiz azumnika, siktar, sie abliz ja kasier.

§ 36.

Ūt jūdiji jūdōb ūt tyōtīemiz pandōks pierrō, statutōd ja tāudkub loptantimist pierrō ja vastatōb ūl ūt ūllizpuol ilm izkist tāudvōimist.

§ 37.

Jūd panab kōrdōl ūt jūokšijist tyōd, dīe jūs pandsō tādōl ka revizij komisij ja taganvartlijist kūozōd ūlznāgtimist. Jūd ūlzandōks um mp vail:

a) Voidō ūtōn vollijist vōi tāmōn usktōd rā summōd, vertazad ja mū vīla.

b) Andō, vōttō ja kouģimōl andō veksōld ja munt vōlga tādōd tāudkubst pandōt rubizis.

c) Klōksō ūt nimsō amasuglist liepandōkst, mū vail ka ūl āblikkijiz vīla.

d) Pīlō ūl ūt interešōd kūod jūs ja munt vālikstōks kūozōd jūs.

e) Vōttō ūtōn vajaglist tyōtējid.

f) Andō tāudvōimist ūt nims;

g) kubbōpāda budzet, tyō plan ja aigast tyō tieut, ja nānt kubs revizij komisij tieutōksōks sizzōl andō tāudkubbō vizantimiz pierast;

h) murtō ūl kōrdaliz ūt rāntōd viedamiz ja tyō jūdizimiz;

i) kēratō ūtlist registrō;

j) askpandō pāda ūt vīla ja

k) tieudō ūl amad munt ūt tyōtīemist nānt statutōd ja tāudkubud pandōkst pierrō tieudōt loptantimist pierrō, murtōs

ūl ūt jōvam.

§ 38.

Ūt tyōtīemi sugub līvlist kiels.

§ 39.

Jūd mied vastatōbōd kubs ūl pūtōkst mis ūtōn at suggōnd nānt sū pierast. Jūd mīez, kis um nustōn vastōkītimist kēraks jūd loptantimiz pāl vōi mingiz īškiz jūd mīe tyō pierast, um vabantōt kubbizōst vastantimizōst. Ūl azad, mis tāuzkub um andōn ūd jūd mīe kāddō, munt jūd mied āb vastantōt.

§ 40.

Jūd kubsvolmīst sābōd pidtōt ku um vajag; nānt kutsub kubbō ūt jūdiji - jūd eđimīez vōi tām ūlzandōks pāl tām azumnika ja ne at tāudōģist, az nānt jūs jaggō vōtab eđimīez vōi tām azumnika ja ama veitō 2 jūd mīestō. Jūd tieb loptantimist ūdkōrdaliz yōld emīimōks ja tām loptantimist at ūģist, az emīimōs um ka kubsvolmiz jūdijiz ūl. Az yōld at jagdōt siz kyzzimiz loptantōb jūdijiz ūl.

Tādōlpanmizōks: Jūd kubsvolmīzīs um vōltōmōst ovald ja vōltimīzōst āb vōi tagan iedō.

§ 41.

Jūd loptantimīst um kōratōmōst protokol rāntō sillō ja nāntōn āndabōd entš alizkēra amad jūsvollijid jūd mīed. Tāudōģimōd ja munt kōrad, mis jūd ulzō āndab um ala kēratōmōst jūd eđizmīen vōi tām azumnikan ja jūd siktarōn vōi tām azumnikan. Veksōldōn um ilm nimtōtōn entš alizkēra āndamōst kuj kuolmandōn - kasierōn.

(jatk jēdp.)

Atbildīgais redsktors K. Stalte.

Izdevōja M. Stalte.

Adrese: Mazirbe. Latvija.

Tuoimiji K. Stalte.

Ūlzandaji M. Stalte.

Adres: Mazirbe. Latvija.